



REPUBLIKA E KOSOVËS -PRESIDENTI
REPUBLIC OF KOSOVO - THE PRESIDENT
REPUBLIKA KOSOVO - PREDSEDNIK

**RREGULLORE (P) NR. 01/2019 PËR CEREMONINË E
BETIMIT TË GJYQTARËVE**

Prishtinë, 24 qershor 2019



REPUBLIKA E KOSOVËS -PRESIDENTI
REPUBLIC OF KOSOVO - THE PRESIDENT
REPUBLIKA KOSOVO - PRESDENIK

Presidenti i Republikës së Kosovës,

Në mbështetje të nenit 84 pika (16), nenit 104 (1) dhe nenit 105 (1) të Kushtetutës së Republikës së Kosovës, nenit 6 të Ligjit Nr. 03/L-094 për Presidentin e Republikës së Kosovës (GZ, Nr. 47, 25 janar 2009), nenit 23 (4) të Ligjit Nr. 06/L-055 për Këshillin Gjyqësor të Kosovës (GZ, Nr. 23, 26 dhjetor 2018) dhe nenit 3 (4) të Rregullores (P) Nr. 02/2016 për strukturën organizative të Presidencës (08.09.2016), miraton:

**RREGULLORE (P) NR. 01/2019 PËR CEREMONINË E BETIMIT TË
GJYQARËVE**

KAPITULLI I – DISPOZITAT E PËRGJITHSHME

Neni 1
Qëllimi

Kjo Rregullore përcakton procedurat në Presidencë, për emërimin e gjyqtarëve me mandat fillestar nga Presidenti i Republikës së Kosovës dhe organizmin e ceremonisë së betimit të tyre para Presidentit.

Neni 2
Fushëveprimi

Kjo Rregullore zbatohet nga njësitë përkatëse në Presidencë, Këshilli Gjyqësor i Kosovës, kandidatet e propozuar për gjyqtar me mandat fillestar dhe pjesëmarrësit tjerë në ceremoninë e betimit të gjyqtarëve.

Neni 3
Përkufizimet

1. Shprehjet e përdorura në këtë Rregullore kanë këtë kuptim:
 - 1.1. **President** – Presidenti i Republikës së Kosovës;
 - 1.2. **Presidencë** – selia e aktivitetit zyrtar të Presidentit, që përfshin Kabinetin e Presidentit, Zyrën e Presidentit dhe institucionet/njësitë tjera të ndërlidhura;
 - 1.3. **Departament** – Departamenti për Çështje Juridike dhe Marrëdhënie Ndërkombëtare në kuadër të Zyrës së Presidentit;
 - 1.4. **Ligj** – Ligji Nr. 06/L-055 për Këshillin Gjyqësor të Kosovës (GZ, Nr. 23, 26 dhjetor 2018);

- 1.5. **Kushtetutë** – Kushtetua e Republikës së Kosovës;
- 1.6. **Këshill** - Këshilli Gjyqësor i Kosovës;
- 1.7. **Kandidat** – kandidati i propozuar nga Këshilli për t’u emëruar gjyqtar në sistemin gjyqësor me mandat fillestar tre (3) vjeçar.

KAPITULLI II - EMËRIMI I GJYQTARIT ME MANDAT FILLESTAR

Neni 4

Propozimi për emërim

1. Këshilli pas zhvillimit të procedurave të rekrutimit, i dërgon Presidentit propozimin e kandidatit për t’u emëruar gjyqtar.
2. Propozimi nga paragrafi një (1) i këtij neni përmban:
 - 2.1. shkresën e Këshillit drejtuar Presidentit, për emërimin e kandidatit, të nënshkruar nga Kryesuesi i Këshillit;
 - 2.2. raportin me shkrim për procesin dhe kandidatin, të nënshkruar nga Kryesuesi i Këshillit;
 - 2.3. vendimin e Këshillit, të nënshkruar nga Kryesuesi i Këshillit dhe
 - 2.4. kopjen e dokumentit të identifikimit të vlefshëm me fotografi të kandidatit.

Neni 5

Shqyrtimi i propozimit

1. Propozimi i Këshillit pas pranimit të tij në Presidencë, i përcillet Kabinetit të Presidentit për njoftim dhe Departamentit për shqyrtim.
2. Zyrtari përgjegjës i Departamentit shqyrton propozimin e Këshillit për emërimin e kandidatit, dhe nëse propozimi:
 - 2.1. nuk është i kompletuar dhe nuk është në pajtim me legjislacionin në fuqi, kërkon plotësimin e tij dhe për këtë e njofton edhe Kabinetin e Presidentit;
 - 2.2. është i kompletuar në pajtim me legjislacionin në fuqi, përgatit opinionin ligjor dhe propozim dekretin, të cilat përmes Drejtorit të Departamentit dërgohen për nënshkrim tek Presidenti.

Neni 6

Emërimi i gjyqtarit

1. Presidenti nxjerr Dekretin për emërimin e kandidatit për gjyqtar, brenda gjashtëdhjetë (60) ditësh, pas pranimit të propozimit të kompletuar nga Këshilli.
2. Nëse brenda afatit të përcaktuar në paragrafin 1 të këtij neni, Presidenti nuk e emëron gjyqtarin, Këshilli mund ta paraqesë edhe një herë tjetër kandidatin e propozuar së bashku me arsyetimin plotësues në formë të shkruar. Pas kësaj Presidenti emëron gjyqtarin sipas propozimit të Këshillit.

KAPITULLI III - CEREMONIA E BETIMIT TË GJYQTARIT

Neni 7

Organizimi i ceremonisë së betimit

1. Ceremonia e betimit të gjyqtarit është ceremoni publike para Presidentit, nëse Presidentit nuk vendos ndryshe.
2. Pas nxjerrjes së Dekretit nga Presidenti për emërimin e gjyqtarit, Departamenti ndërmerr veprimet e nevojshme për organizimin e ceremonisë së betimit për gjyqtar.
3. Departamenti, në bashkëpunim me Departamentin e Protokollit dhe në konsultim me Kabinetin e Presidentit, cakton vendin, datën dhe orën e ceremonisë së betimit për gjyqtarin e emëruar, si dhe përgatit listën e pjesëmarrësve, që do të ftohen në ceremoni.

Neni 8

Njoftimi

1. Departamenti, njofton Këshillin për vendin, datën dhe orën e ceremonisë së betimit për gjyqtar si dhe për kodin e veshjes.
2. Këshilli njofton kandidatin, për:
 - 2.1. vendin, datën dhe orën e ceremonisë së betimit; dhe
 - 2.2. kodin e veshjes.
3. Departamenti, fton pjesëmarrësit tjerë në ceremoninë e betimit të gjyqtarit nga lista e përgatitur në pajtim me nenin 7.3. të kësaj Rregulloreje.

Neni 9

Përgatitjet për ceremoninë e betimit

1. Departamenti i Protokollit, për ceremoninë e betimit për gjyqtar, përkujdeset për:
 - 1.1. rezervimin dhe rregullimin e vendit;
 - 1.2. pritjen dhe vendosjen e të ftuarve, sipas rregullave protokollare;
 - 1.3. paraqitjen dhe veshjen sipas kodit të veshjes dhe
 - 1.4. çështje tjera protokollare.

Neni 10

Udhëzimet për procedurat e ceremonisë së betimit

Para fillimit të ceremonisë së betimit, zyrtari i Departamentit, e udhëzon gjyqtarin për procedurën e ceremonisë së betimit dhe pjesëmarrësit tjerë.

Neni 11

Ceremonia e betimit

1. Gjatë ceremonisë së betimit:
 - 1.1. gjyqtari ka një dosje para veti, që brenda ka tekstin e betimit në dy kopje;
 - 1.2. të gjithë të pranishmit ngritën në këmbë;
 - 1.3. gjyqtari ngrit dorën e djathtë lartë me shuplak të hapur;

- 1.4. Presidenti, e lexon tekstin e betimit;
 - 1.5. gjyqtari pas përfundimit të leximit të tekstit të betimit nga Presidenti, më zë të lartë thotë: Beto hem;
 - 1.6. pas dhënies së Betimit, Presidenti, gjyqtari dhe pjesëmarrësit tjerë ulen;
 - 1.7. gjyqtari i nënshkruan dy kopje të tekstit të betimit, njëri mbetet në Presidencë dhe
 - 1.8. në përfundim të ceremonisë së betimit, Presidenti i dorëzon gjyqtarit dekretin për emërim.
2. Gjyqtari me nevoja të veçanta, betimin para Presidentit mund ta bëjë duke ju përshtatur nevojave dhe kërkesave specifike, ku në këto raste Këshilli duhet të njoftoj paraprakisht Presidencën.
 3. Gjyqtari i sapoemëruar merr detyrën e gjyqtarit pasi të ketë dhënë betimin para Presidentit.

Neni 12 Informimi

Presidenca, informon publikun për emërimin dhe betimin e gjyqtarit në sistemin gjyqësor përmes ueb-faqes zyrtare të Presidencës apo formave të tjera.

Neni 13 Konfidencialiteti

1. Zyrtarët e Presidencës, gjatë kryerjes së detyrave në lidhje me përpunimin e të dhënave në procesin e emërimit dhe betimit të gjyqtarit duhet të ruajnë konfidencialitetin e të dhënave.
2. Dështimi për të respektuar konfidencialitetin paraqet shkak për fillimin e procedurës përkatëse në pajtim me legjislacionin në fuqi.

KAPITULLI IV- DISPOZITAT PËRFUNDIMTARE

Neni 14 Regjistri

Departamenti, mban Regjistrin e dekretëve të Presidentit për emërimin e gjyqtarëve.

Neni 15 Hyrja në fuqi

Kjo Rregullore hyn në fuqi ditën e miratimit me dekret nga ana e Presidentit.

Hashim THAÇI

President i Republikës së Kosovës

Prishtinë, 24 qershor 2019.

**Miratuar me Dekret Nr. 131/2019, datë 24.06.2019,
nga Presidenti i Republikës së Kosovës Hashim Thaçi**